

太上玄靈北斗本命延生經註卷上 陰一

傳洞真註

太者至大之名上者尊崇之稱極大窮高謂之太上玄者微妙也靈者聖化也北斗者按河圖經旁通圖云北斗是九天之精

鬼九地之靈鬼九星之妙象九州之威神本命者是本命元辰每歲六度降下人間

校定世人罪福延生經者是修真之徑路也玄元始三炁玄生於地元生於人始生於天人法地地法天天法道法自然也

人法之於地故曰玄人惟萬物之靈故曰靈道生一一生二二生三三生九三炁為天地之尊九炁為萬物之根北斗處中天理九炁九一之道統於玄一玄生於地而法於人故曰北斗本命也人得其生自分

一炁從炁而生出於玄一既自分炁而生當明其根本復守玄一以延其生也

爾時

爾時者指當初說經之時也

太上老君

天地初分一炁生元始二炁生元皇三炁生老君老君居下而為化主也在天為萬天之主降世為百王之師在星曰天皇大帝在教曰太上老君作太清宮中大聖老君者非以永壽元年正月七日

永壽乃漢桓帝年號歲次乙未正月初七日也

在太清境上太極宮中

太清境者即老君所都之地也其宮名曰三皇洞神太清太極宮開天經云圓蓋之頂无上大羅之天三清之境也玉清聖境

十二聖天玉清之下上清真境十二真天上清之下太清仙境十二仙天太清之下四種民天民天之下无色界四天无色界之下色界十八天色界之下欲界六天欲界之下中通太虛下為人界三清三境三十六天下生三界萬物流形八方以下各生五萬五千五百五十五億无極世界此地等天八方皆三千大千世界皆乘三清三元上下三十六天每四方九州列地上

應天機三十六門所以三才通炁天人相感同稟道生也太清之境在玉清上清之下在三界萬天之上矣一本作太清宮中觀見衆生

太上常在宮中四盼天下慈憫衆生

億劫漂沉周迴生死

人生不悟漂沉苦趣生死輪迴雖經億劫無有了期

或居人道生在中華或生夷狄之中或生蠻戎之內

人道者六道中之一道也中國四夷八荒一本作非內外並有三業五累者皆屬於人道

或富或貴或賤或貧暫假因緣墮於地獄

為善為惡造福造罪人心不同報緣各異陰司紀錄無有差殊

為無定故

定一之法性相之根本登真之門戶也太古之人不假修習而心常定者蓋薄白不分大樸不散故也後世人心僥薄機僻肆

起溥穢散壞而罪根漸長心無所主則與道隔越矣太上老君是以西渡屬賓立般若門敷演心法廣論經教以接羣悟奈何末世之人目貴華色口貪珍味鼻欣蘭麝身欲肥輕意不能止昏我性根徒多口誦心不能持夫上古之人甘其食任其服樂其俗而高下不相慕至於老死不相往來各無彼此之好不假修習道自成矣今習定之士皆云不可勝像執相若有分毫差礙便是錯了是則是矣不知從何處下手道書有內觀經定觀經清淨經消災經坐忘論此諸經論最為明語人猶摸索不定何況其他散漫之言焉能取用哉唯此北斗延生真經為性相之根本大定之便門也若能依經守用便見定源到無想無結無愛處時即知此經功德不可思議也

五

受此輪迴

罪業牽纏冤繫陰司受苦滿足人道將蓮生居畜獸之中或生禽蟲之屬轉乖人道難復人身如此沉淪不自知覺為先世迷真之故

罪業者十罪皆從三業而起身業三殺生偷盜淫慾罪口業四妄語綺言兩舌惡罵罪意業三貪愛真恚愚癡罪牽者牽連也纏者纏縛也言人不能諦性相之根本悟登真之門戶漂浪愛河流吹慾海為諸罪業牽連纏縛不得解脫是致陰司繫留陽寇受諸苦惱直待滿足之日將此違背人道不得降生以致墮落獸畜禽蟲之中轉見乘度不得人道難復生為人身如此沉淪埋沒不自知省覺悟皆為前生昏迷真性之故所以受此輪迴果報也

乃以哀憫之心分身教化化身下降老君哀憫眾生化身下降演說經教開悟羣迷太玄經曰九天帝君各排仙仗詣太清宮中迎請老君各赴一天講演中黃九道儼然端拱於太極之殿萬億化身隨方設教應機立號普濟天人所以朝朝降蹟代為帝師也

至於蜀都地神湧出

西蜀其地在成都府開天經曰無極世界

之下又為一界列九壘三十六土皇君九壘之下風澤之系似風非風似水非水識苦性昏不可分別擎持地輪全不傾倒風澤之上九壘之中地神所以居處天尊地卑太上下降地神出而捧足於禮固宜矣扶一玉局而作高座於是老君陞玉局坐授與天師真人北斗本命經訣

天師姓張氏沛豐邑人留侯子房八世孫也漢傳本名陵後入道添道字道書皆曰道陵字漢輔今避道陵諱以真人字代之

天師與老君同遊成都至太昊玉女修大丹之所感地神湧一玉局座高丈餘老君陞於玉局天師稽首座下此時老君為說北斗延生削死之法授與天師

其地在成都府南門之左一里餘今有五局觀并局牀脚四石存為天師布治列屬第二十三治矣此乃經也訣者法也別有玄靈經訣用法以行此經之事

廣宣要法普濟眾生

太上慈悲廣大宣明秘要經法普行濟度  
衆生不問賢愚使人能解悟修行可見正  
真之道

是時老君告天師曰人身難得

生神章經云人之受生於胞胎之中三元  
養育元炁結形故九月神布炁滿能聲聲  
尚神具九天稱慶太一執符帝君品命主  
錄勤籍司命定算五帝監生聖母衛房天  
神地祇三界備守九天司馬在庭東向讀  
九天生神寶章九過男則萬神唱恭女則  
萬神唱奉男則司命敬諾女則司命敬順  
於是而生九大司馬不下命章萬神不唱  
恭諾終不生也夫人得還生於人道濯形  
太陽驚天駭地貴亦難勝天真地神三界  
齊臨亦不輕也當生之時亦不為陋也如

此人身實難得矣先賢有喻曰布芥於於  
崑崙之頂持針於下以承之相遇之者方  
得人身墜落之者應當無數如是可謂難  
得矣

中土難生

中土乃中華福地人天最貴之國福緣淺  
薄中土難生也

假使得生正法難遇多迷真道多入邪宗

尹真人云正人說邪法邪法悉歸正邪人  
說正法正法亦歸邪法無邪正道無二端

人有邪心互生雜亂不能自明正法難遇  
也

多種罪根多肆巧詐多恣淫殺多好厚情多  
縱貪嗔多沉地獄多失人身

六根不能清淨諸罪自此而生巧詐刀綺  
言兩舌妄語人多放肆而不務檢束淫殺

乃淫欲殺生人多恣為而不知節戒情實  
衆多人皆好之而不能窒塞貪愛嗔恚人  
多縱之而不能收斂身謝之後沉淪於地  
獄之中受諸苦惱而不得為人身矣

如此等緣衆生不悟不知正道迷惑者多

如是前項等緣衆生不能覺悟正道所以  
迷惑者甚多也

我今哀見此等衆生故垂教法為說良緣令  
使知道知身性命皆憑道生了悟此因長生

人道種子不絕世世為人

老君哀見衆生故說經訣良緣令使悟道

內觀經曰自一粟形謂之性從道受生謂

之命人之性命皆從道而生知其道而行  
之者如春耕種秋必收成復有來春春復

下種復得再生生生之生皆由此道也  
不生無道之鄉

有道之君撫民如赤子無道之君視民如  
草芥如夏桀商紂之君秦皇隋煬之時晉

魏之代亂世相繼此時為人豈為幸哉生  
居有道之邦其惟大善乎

不斷人之根本

既悟此道則世世為人根本不斷矣

更能心修正道漸入仙宗永離輪迴昇成  
道

道在於心守而不失當漸次有成也人之

修學皆從其漸易所以有漸卦如老子曰  
合抱之木發於微末千里之行始於足下

但患知道而不修行者無不及也能修正  
道進之以漸可離輪迴可成道矣

我故示汝妙法令度天民歸真知命

老君授天師玄妙之經訣令覺悟下士歸

其真道知其元命

可以本命之日修齋設醮啟祝北斗

人之元命謂之小撮會身中之神皆聚集

於元宮校定罪福每六甲一周故經中云

每歲六度降在人間是日宜修齋醮啟告

斗星懺罪消災延生祈福

### 三官

上元賜福天官中元赦罪地官下元解厄

水官也七元所統以隸三元又三命之所

歸也

### 五帝

青帝屬木赤帝屬火白帝屬金黑帝屬水

黃帝屬土人稟五行受形五帝無所不關

也

### 九府

上元三宮九府中元三宮九府下元三宮

九府合九官二十七府上元三十六曹中

元下元各四十二曹計一百二十曹總統

天上天下人物靈仙鬼神羣類萬物悉皆

開會斗官以通內外之職毫分不差

### 四司

天曹四司者司命司錄司非司危也地府

四司者司命司錄司功司殺也

薦福消災奏章懇願

凡所懇之願具以章詞表狀以盡其情事

宜實告辭不以文可以消除災厄薦請福

祥

虔誠獻禮種種香花時新五果

四時新成之果謂之薦新五者桃李棗栗

杏是也當虔誠薦獻其禮

隨世威儀

世之威儀進退俯仰趨伏壇陛讚拜朝會

慶讚之禮也獻花酌水棗湯細茶世之儀

也高下之所宜陳之而不上以論王公

大人次以論大富長者次以論中庸之家

下以論貧窮之屬各量己之受用陳以為

誠而已且高下有別如親朋慶會各以威

儀相攝當是時也貴之與富水陸畢陳中

庸之家亦須粗辨以人命人猶尚如此將

命天真可輕率乎初非奢論存乎威儀者

也至于金銀雲馬亦世上之儀也天師曰

太古無錢中世始用燒錢化馬亦隨世用

矣天地始判已有天錢之星用司其事時

更代變星辰應機與道合同陰陽通義也

若用河圖古法醮斗則別有威儀與世像

不同矣

清淨壇宇法天像地

清淨宅舍以圓法天以方像地謂立壇之

式內圓而外方也

或於觀宇或在家庭隨力建功請行法事

觀宇家庭皆可醮祭隨其事力以建功德

無力者惟存一心有力而慳又非隨力也

功德深重不可具陳

所修功德實為深重不可聲述

念此大聖北斗七元真君名號當得罪業消

除災衰洗滌福壽資命善果臻身凡有急難

可以焚香誦經剋期安泰

至心稱念北斗聖號當得罪業隨消災衰

洗滌福壽助命善果及身凡人急難之處  
焚香誦念剋時而應即獲安寧也

於是說大聖北斗解厄應驗曰  
修持經訣之人可解諸厄應驗如此所宜  
禱謝

大聖北斗七元君能解三災厄

三災星也臨年最為重災告斗法有置三  
災星於斗口之前供養者良由此星掃惡  
於諸厄之首也其例寅午戌生人至申酉  
戌年值此人皇星天福星地災星為之三  
災申子辰生人至寅卯辰年值此天蠱星  
天刑星天字星為之三災巳酉丑生人至  
亥子丑年值此地敗星地亡星地刑星為  
之三災亥卯未生人至巳午未年值此黑  
惡星陰謀星白殺星為之三災凡人遇會  
臨命之時三年之內必有災厄預宜解之  
則獲福也  
大聖北斗七元君能解四煞厄  
年煞月煞日煞時煞謂之四煞遇於寅申  
巳亥辰戌丑未子午卯酉之年月與人之

四柱衝對而全者皆謂之四煞若犯之必  
重災預宜禱解

大聖北斗七元君能解五行厄

金剋木木剋土土剋水水剋火火剋金者  
也人之五行不順而互有剋制則將有其  
災預宜解之

災預宜解之

大聖北斗七元君能解六害厄

子見未未見子丑見午午見丑寅見巳巳  
見寅辰見卯卯見辰申見亥亥見申酉見  
戌戌見酉互換相遇謂之六害命書云六  
害重達多見憂而少樂當禱解之

大聖北斗七元君能解七傷厄

劫煞災煞天煞地煞歲煞月煞亡神謂之  
七傷上配七星之精人若逢之豈無災禍  
速宜告解

大聖北斗七元君能解八難厄

人之本命分為三元以千為天元以支為  
地元以納音為人元以三元配五位也此  
八事順則為福逆則為禍如歲月命分過  
之必凶事湊來急宜禱謝以解之

大聖北斗七元君能解九星厄

一羅睺二土宿三水星四金星五太陽六  
火星七計都八太陰九木星其九星配合  
亦當屬斗官所管行年遇之論強弱官分  
或凶或吉如遇為凶亦當設告斗官而禱  
解之

解之

大聖北斗七元君能解夫妻厄

人之匹配陰陽之道當須配合而後成之  
此古聖之法也其間鄙俗或傳有天婚者  
更不勘合致使陰陽不利其禍非一至如  
孤辰寡宿陰煞陽煞前五後五煞陽煞陰  
煞夫煞妻絕房孤鸞等神皆有明例如犯  
之重者至三妻九妻三夫五夫或至終身  
空室者多矣適有會遇亦可禱謝  
大聖北斗七元君能解男女厄

此厄所致多端亦由夫妻年命或祖先墳  
墓所招或損陰德種種不生如年命墳墓  
之災可以解謝而求之若有失陰德急宜  
謝罪斗官立功植德以種其嗣非此則不  
能也

大聖北斗七元君能解產生厄

凡婦人命犯三刑金煞流血屍之神可以解之若抱妬懷冤急宜告謝斗官日新其德以免厄難

大聖北斗七元君能解復連厄

傳尸之病又曰尸注流注而不絕至於滅門又謂之塚訟徵呼速宜修善依法解除矣

大聖北斗七元君能解疫癘厄

瘟黃時疫也人之不養靈根恣食辛厭不義不仁六屬不和香火不修神祇不佑致使家遭瘟疫身染毒炁大小疾病人口死亡或其罪大至于絕門此厄謂之天行者今出天府也傳染一二則急宜禳告以解之

大聖北斗七元君能解疾病厄

法謂積疾新病皆當消散

大聖北斗七元君能解精邪厄

經云妖邪尅害以法解除

大聖北斗七元君能解虎狼厄

術云以子生人遇卯丑生人遇辰順行以定之命犯勿入山林恐有虎狼之禍也又以子生人遇申丑生人遇酉亦順行以定之名虎狼殺也及其七煞金煞亦有破體之災固當解也或欲入山先當用法以禳

之又自此厄至地網厄通謂之八難厄也大聖北斗七元君能解蟲蛇厄

抱朴子云中州地氣清和無有毒蟲南方地氣不正氣多迅烈多生毒蟲子將出入山林當預防以解之

大聖北斗七元君能解劫賊厄

水陸往來預宜告解以防不虞也夫劫盜相逢侵害財物者是前生今世偷盜國王財物所以為報也此時恐性命不存急宜投告北斗稱其名號應時免難矣

大聖北斗七元君能解枷棒厄

天律云久淹囹圄有枷棒之災情負屈抑不能理雪者牒本屬城隍委推勘官吏令心神通曉速為于決時師行之皆有明效況祈禳於斗官者乎

大聖北斗七元君能解橫死厄

此例千條難以具悉但不得其死者皆謂之橫死也疑有此預須告解必獲感應若故犯陰陽之法其可解乎

大聖北斗七元君能解天羅厄

此厄亦非一條天律曰諸非品官鬼神不得受人呪咀蓋非得道大神無智慧之性但信誣呪人辯是非長便執人冤鬼令人顛狂迷亂或陰陰不語或久伏於枕席者皆由此也可以告解之

大聖北斗七元君能解地網厄

以戌亥為天羅人命運炁二限遇之恐有天獄之災宜預以解之

大聖北斗七元君能解地網厄

以辰巳為地網人命運炁二限遇之恐有郡縣牢獄刑禁之災預宜解謝之又人三命四柱遇咸君為合者謂之晦氣亦主羅網之災也

大聖北斗七元君能解刀兵厄

刀兵之厄厥有劫數若能志心皈奉斗真

自然過度劫難矣

大聖北斗七元君能解水火厄

洪水泛溢劫火洞然最為慘酷斗真護之則在劫不在數矣

於是七元君大聖善通靈濟度諸厄難超出

苦衆生若有急告者持誦保安平盡憑生百福咸契於五行

五行者指人之身肺屬金肝屬木腎屬水

心屬火脾屬土北斗星君通此玄靈濟諸厄難超苦衆生若人急告持誦生百福合

五行則五臟安寧也

三兔得安健

太玄育兔生炁內康也

邪魅不能停

七兔逐真三尸遁跡水守玄靈而邪不干

正矣

五方降真炁萬福自來并

中黃經云肝主東方其色青肺主西方其色白心主南方其色赤脾主中央其色黃腎主北方其色黑今五神混合五臟安寧

胎息命根真炁自降五炁將以朝元玄靈將有所化則萬福自來合并矣中黃又曰羽水彩霞何所有皆由五臟生靈莫此之謂也

長生超八難皆由奉七星

八難者上尸曰天徒中尸曰地徒下尸曰水徒三徒者三界之徒役也又色累曰苦心門愛累曰苦神門貪累曰苦形門華競曰苦精門身累曰苦鬼門此三尸五累總曰八難造業而死者累其五苦責役三徒

若有虔奉斗星道備之人則超度八難而上昇九天矣九天者非三清之九天奉北斗而行玄靈經訣而昇斗中之九天也斗中九天者貪狼居靈華天巨門居神華天祿存居玄黃天文曲居華黃天廉貞居元

皇天武曲居中黃天破軍居真皇天輔星居太常天弼星居變靈天也

生生身自在世世保神清

人之身所以得其自在者無拘執之謂也拘執之者貪著故也去執忘貪則生生身

得自在矣人之心神所以得其清淨者無穢濁之謂也穢濁者繞亂故也澄而靜之世世心神清矣身自在而心神清則道自然得矣

善似光中影應如谷裏聲

如鑑照形妍醜自別似聲應響善惡無差譬之於道者虛心為谷明心為鏡心虛則道降道降則心通通則明矣雖然有見見而不可取雖然有聽聽而不可聚所謂視之不見聽之不聞收視返聽於至寂之中

證虛无之道雖云證道實無所證守虛至極真人降矣聖道達矣

三元神共護萬聖眼同明無災亦無障永保道心寧

三界十方千萬萬聖一體同觀護持受經之士無災厄無魔障道心長保其寧固矣

太上玄靈北斗本命延生經註卷上

太上玄靈北斗本命延生經註卷上